



Br: 01-SC-35/18

Phoenix, AZ: 23. ša'ban 1439. god. po H.,  
8. maj 2018. godine

## SVIM DŽEMATIMA ICNAB-a

Predmet: Čestitka povodom nastupajućeg ramazana,

Esselamu alejkum!

Izuzetno zadovoljstvo nam je podijeliti sa vama da u utorak 15.5. 2018.g, sa prvim tekbirom akšamskog ezana, prema takvimu Rijasetu islamske zajednice u Bosni i Hercegovini, s radošću dočekujemo mubarek najodabraniji mjesec u godini dana. Ovo je mjesec Kur'ana, posta, ibadeta, mjesec duhovnog uzdizanja, pokajanja, ibadeta i preispitivanja vlastitog imana, kroz primjenu islama, to jest, šerijatskih propisa, ahlaka i ihsana. Mjesec Ramazan je mjesec preispitivanja vlastitog odnosa prema temeljima islama.

Bez sumnje, najveći smisao i cilj ramazanskih ibadeta i jedna od najvrednijih odlika islama je to što je islam univerzalna i sveobuhvatna vjera, koja insanu daje priliku za tevbu, pročišćenje i oplemenjenost duše, te njeno uzdizanje u pravcu lijepih i plemenitih moralnih osobina. Svi ibadeti u ramazanu obuhvataju različite segmente ljudskog života i ne razdvajaju ih od etike i morala, niti znanje od djelovanja i praktične primjene tog znanja. U suri el-Bekare, Svevišnji kaže: **”U mjesecu ramazanu počelo je objavljivanje Kur’ana, koji je putokaz ljudima i jasan dokaz Pravoga puta i razlikovanja dobra od zla.”**

Svevišnji Allah nije propisao različite vrste ibadeta bez ikakvog smisla, sadržaja ili svrhe, nego naprotiv, svi sadrže moralne vrijednosti koje se trebaju odraziti na kvalitet karaktera, ponašanja i ophođenja muslimana i muslimanki prema drugim ljudima, te stoga i možemo reći da je ramazan mjesec ahlaka i škola morala.

*Šehadet* je temelj ispravnosti ljudskih djela i potvrda uvjerenja da ne postoji niko, osim Allaha, ko zaslužuje da mu se iskazuje ibadet i pokornost i da je Muhammed, s.a.v.s., Njegov rob, tj. insan kojeg je odabrao da ljudima prenese Njegovu Objavu.

*Namaz* je najvažniji temelj islama i najbolje sredstvo pročišćenja ljudskih duša od loših osobina i njihove oplemenjenosti, kojim se postiže duševni mir i oslobađa od tjeskobe i svakodnevnog stresa. Uzvišeni Allah kaže: **“I obavljaj namaz, a zaista namaz odvraća od razvrata i svega što je ružno.”** (El-Ankebut, 45) A kada bi naređivao Bilalu da prouči ezan, Poslanik, s.a.v.s., je uobičavao reći: *“Odmori nas njime (namazom), o Bilale!”*

*Post* je štit protiv mnogih tjelesnih bolesti i zaštita i brana od svih moralnih poroka, kako nam to Poslanik, a.s., oporučuje riječima: *„Post je štit, pa kada neko od vas bude postio, neka ne govori ružne riječi i neka ne galami. A ako ga neko bude vrijeđao ili na njega nasrtao, neka kaže: 'Ja postim!'“* (Buhari i Muslim)

*Zekat*, poput namaza, sa zekatul-fitrom, izgrađuje plemenite moralne vrline, solidarnost i samilost u društvu, zajednici i izgrađuje prisne odnose između različitih slojeva društva. Ibn Abbas je o svrsi zekatul-fitra rekao: *“Poslanik, s.a.v.s., je propisao zekatul-fitr kao čišćenje postača od beskorisnog i ružnog govora i kao hranu za siromahe.”*

Molim Svevišnjeg Allaha, da nas svaka naša sedžda u namazu uzdigne za jednu deredžu i izbriše jedno ružno djelo, da svaki dan posta pročisti našu dušu i srce, oslobodi od tjeskobe i svakodnevnog stresa, da zekatom i sadakom pročistimo svoj imetak, da poslije lošeg djela nastojimo uraditi dobro, koje će ga poništiti i da se prema ljudima na lijep način ophodimo.



Cijenjeni članovi Islamske zajednice Bošnjaka Sjeverne Amerike, poštovani imami i predsjednici, članovi džematskih odbora, cijenjene džematlije, braćo i sestre, radujmo se ovim mubarek danima i svim koristima koje nam oni donose. Neka nam ramazan bude mjesec strpljivosti, iskrenosti, dobročinstva, plemenitosti, održavanja rodbinskih veza, milosti, praštanja, blagosti i uravnotežene ličnosti, bogobožnosti, jačanja i prosperiteta naše zajednice, te svijesti da smo pod konstantnim Allahovim nadzorom.

Svima vama, vašim porodicama, kao i svim muslimanima i muslimankama, čestitam nastupajuće mubarek dane, sa željom da ih provedete u radosti i veselju sa svojim najbližim, prijateljima i komšijama.

**RAMAZAN ŠERIF MUBAREK OLSUN!**

Dr. Sabahudin ef. Čeman  
Muftija